

## ■ CONVIVENZA

# Spetgar sin...

DA BETTINA CADOTSCH\*

**P**robablamain spetgain nus tuts vess il mument cura che la vita daventa puspè normala. Ina vita senza corona. Perquai as vi jau raquintar d'intgins patratgs davart il tema spetgar ch'jau hai fatg las davosas emnas. Jau sun numnadamain vegnida en il cler davart diversas chaussas.

**I**na chaussa ordavant: Jau schess che spetgar è ina chaussa nua che nus umans n'essan betg experts. U cun auters plects: Jau n'hai anc mai udì a dir insatgi ch'el spetgia gugent.

**P**ertge era? Noss temp è rar e custaivel. Nus vivain sulettamain ina giada e nus na vulain betg sfarlatar noss temp ch'ans stat a disposiziun. Nus essan conscients che la vita n'è betg infinita. Tgi sa, forsà eran nus pli baud pli lucs quai che riguarda avair pazienza? Pli baud, cura che la vita era pli simpla. Pli plau-na. Main cumplitgada. Ma ozendi associain nus spetgar savens cun perder temp.

**J**au crai che la digitalisaziun haja contribuì ina massa al fatg che nus umans essan inabels da spetgar. Era sche nus avain da spetgar mo duas minutas prendain nus nauador automaticamain noss telefonin. Esser tschintg minu-



tas sulet, cun ils agens patratgs, sesend, senza far insatge – in'imaginaziun curriusa. Sche vus na cartais betg, lura observai ina giada co che la gliעד sa cumporta en stanzas da spetga a la staziun.

**U**ssa as less jau dir dus puncts quai che pertutga il spetgar che paran in zic cuntravers. Punct 1: Jau schess ch'i faschess bain a nus da puspè emprender da spetgar. Propi spetgar. Forsa che quel temp da corona – ch'ha pretendi blera pazienza da nus – ans ha era puspè purtà in zic pli manaivel a quai.

**C**ura ch'ins spetga pon ins numnadamain far ina massa patratgs davart la vita, per ils quals ins n'ha forsà betg tanta peda durant il di structurà e planisà. Ins vegn forsà attent ad insatge ch'ins na vegn uschiglio betg. Ins savura u vesa insatge ch'ins na savurass u vesess uschiglio betg. Spetgar na sto betg exnum signifigat perder temp.

**I**l punct 2 è exact il cuntrari. Las ultimas emnas sun jau numnadamain vegnida en il cler che nus umans spetgain tranteren memia savens. Quai cunzunt sin il futur. Entant giudain nus memia pauc il mument. Plinavant embli-dain nus il fatg che nus stuan sezs prender l'iniziativa per bleras chaussas e betg spetgar. Qua pens jau adina a Pippi Socalunga. Ella ha gia adina ispirà mai cun sia idea: «Jau fatsch mes mund uschia sco ch'el plascha a mai.» Ella na spetgava mai sin insatge, mabain fascheva simplamain quai che plascheva ad ella.

**I**l facit da l'entira chaussa: Jau manegel ch'i faschess bain a nus tuts da chattar ina maschaida tranter sentir il mument, cura ch'igl è da spetgar – e lura propi spetgar e tadlar sin sasez – ed il mument, cura ch'ins sto prender curaschi e far quai, sin quai ch'ins spetgava daditg. La vita po numnadamain esser curta ed i po era capitar ch'ins spetga lura memia ditg sin insatge.

\* Bettina Cadotsch è creschida si a Savognin. Ella studegia Multimedia Production a la scola auta spezialisada dal Grischun a Cuira e lavurata Radio Südostschweiz e «suedostschweiz.ch»

La convivenza da las linguas e culturas en il Grischun – quai è il tema da las columnas che cumparan sut il titel «Convivenza» mintga glindesdi en las gasaettas «Südostschweiz» e La Quotidiana.